

বার্লিন স্টেশনের শীতল অভ্যর্থনা

কাজী জহিরুল ইসলাম

সুপ্রাচীনকালে মানুষ জলাশয়ের পাড়েই বসতি গড়ে তুলতো। খাদ্য ও সমৃদ্ধির সন্ধ্যানে নৌপথে পাড়ি জমাতো এক স্থান থেকে আরেক স্থানে। নতুন কোন ঘাটে গিয়ে গড়ে তুলতো নতুন বসতি, নতুন লোকালয়। পৃথিবীর সকল প্রাচীন সভ্যতাই গড়ে উঠেছে কোন না কোন নদী বা সমুদ্র বন্দরে। ষষ্ঠ শতকে উল্লেখযোগ্য সংখ্যক স্লোভাক জনগণ পূর্ব ইউরোপ থেকে সরে এসে নতুন বসতি গড়ে তোলে পশ্চিমের এলবে এবং ওডের নদীর তীরে। ৭২০ খ্রীষ্টাব্দে ওদের দুটি গোত্র আরো পশ্চিমে সরে এসে হেভেল নদীর তীরে নতুন বসতি গড়ে তোলে। এই সম্প্রদায়টিই হেভেলার হিসেবে পরিচিতি পায়। স্প্রে নদীর তীরে যারা বসতি গড়ে তোলে ওদের নামকরণ হয় স্প্রেওয়ানেন। স্প্রে এবং হেভেল নদীর পাড়ে গড়ে ওঠা লোকালয়টিই আজকের বার্লিন শহর। যে শহরের গোড়াপত্তন করে পূর্ব ইউরোপের স্লোভাক সম্প্রদায়, যারা পরবর্তিতে হেভেল এবং স্প্রে নদীর নামানুসারে নামধারণ করে যথাক্রমে হেভেলার এবং স্প্রেওয়ানেন।



বার্লিনের কেন্দ্রীয় রেলস্টেশন

হেভেলার ও স্প্রেওয়ানেনদের বিকশিত সভ্যতায় পা রেখে আমরা শিহরিত। হেভেল নদী কালের গর্ভে বিলীন হয়ে গেছে। বার্লিন শহরের মধ্য দিয়ে যে নদী প্রশান্ত ধারায় প্রবাহিত হচ্ছে তার নাম স্প্রে। স্প্রে নদীর পাড়ে অনেক আগেই ভোরের আলো ফুটেছে। আমরা ইউরো রেল থেকে যে স্টেশনে নামলাম, যতদূর মনে পড়ছে ওখানে লেখা ছিল, জুয়োলোজি। একদল শাদা চামড়ার মানুষ নিঃশব্দে

ট্রেন থেকে আমাদের সাথেই নামলো । ঠিক যেন তার সমান সংখ্যক আরেকদল মানুষ এগিয়ে এসে আগন্তুকদের সাথে কোলাকুলি করে, পরস্পরের গালে চুমু খেয়ে অতি নিঃশব্দে সৌহার্দ্য বিনিময় করলো । এরপর জোড়ায় জোড়ায় স্টেশন থেকে বেরিয়ে গেলে আমরা অভাগা চার বাঙালী আশে-পাশে তাকিয়ে দেখি কেউ নেই । জুয়েলজি স্টেশন শূন্য । নিজেদেরকে খুব অসহায় লাগছে । আনোয়ারুজ্জামানের মন-মেজাজ খুবই খারাপ । তিনি খুব অস্থির প্রকৃতির মানুষ । এমনিতেই টাকা হারিয়েছেন, তার ওপর আমাদের যিনি রিসিভ করার কথা তার কোন পাত্তা নেই দেখে জামান ভাইয়ের মেজাজ টং হয়ে আছে। ‘অহন কি করবেন ? আর কতোক্ষণ খাড়াইয়া থাকবেন ? লন একটা ট্যাক্সি লৈয়া কোন হোটেল গিয়া উঠি ।’ এই লোকের কথা শুনে আমরা হাসবো, না কাঁদবো ? তার পকেটে একটি ফুটো পয়সাও নেই অথচ বলছে, ট্যাক্সি নিয়ে হোটেল যাবে ।



ব্রান্ডেনবার্গ গেইট, যা বার্লিন গেইট নামে পরিচিত

আমাদের ভিটিনার সহকর্মী এবং প্রতিবেশী জাহিদ হায়দারের কাছে যতদূর শুনেছি তিনি খুব দায়িত্বশীল মানুষ । কথা যখন দিয়েছেন, অবশ্যই আসবেন । হয়ত ঘুম থেকে উঠতে দেরী হয়ে গেছে । এই সাত-সকালে কাউকে রিসিভ করতে স্টেশনে আসা খানিকটা বিরক্তিকরতো বটেই । জামান ভাই এসব যুক্তি মানবেন না, ‘কবিগো কোন কথার ঠিক আছে নি ? কবির ভাই যখন হে-ও নিশ্চয়ই কবি । দেহেন কুনহানে মদ-মুদ খাইয়া পৈড়া রেছে ।’

আমরা স্টেশনের ভেতর পায়চারী করতে শুরু করলাম । আবার সেই পূর্বের অবস্থা । পার্থক্য হলো, ভিয়েনার ওয়েস্ট বনহফ স্টেশনে প্রচুর লোক ছিল আর বার্লিনের জুয়োলজি স্টেশন সম্পূর্ণ ফাকা । কোন সৌন্দর্যই মানুষের উপস্থিতি ছাড়া পূর্ণ হয় না । পশ্চিম ইওরোপের সবচেয়ে সমৃদ্ধ অর্থনীতির দেশ জার্মানী । বার্লিন সেই জার্মানীর রাজধানী । বার্লিন শহরের এই নির্জন রেলস্টেশনটি যতোই আধুনিক আর মনোরম হোক না কেন, এর সকল সৌন্দর্যই ক্রমশ আমাদের কাছে বিরক্তিকর হয়ে উঠছে । কফি ভেভিং মেশিনে কিছুক্ষণ খোঁচাখুঁচি করে কিছুই বের করতে পারলাম না । ইন্দো-ইওরোপীয় অরিজিন থেকে তৈরী ডয়েচ ভাষায় নির্দেশিকা লেখা রয়েছে । সেই ভাষা আমরা পড়তে পারছি কিন্তু কিছুই বুঝতে পারছি না । ইওরোপের সব ভাষাই রোমান হরফে লেখা হয় বলে পড়া যায় ঠিকই কিন্তু ভাষা না শিখলেতো আর মাথা-মুণ্ডু কিছুই বোঝা যায় না । কফি ভেভিং মেশিনের পাশেই একটি সুদৃশ্য কনডম ভেভিং মেশিন । এর উল্টোদিকে বিশাল এক কেবিনেট । কেবিনেটে অসংখ্য লকার । প্রতিটা লকারের ওপরই নম্বর দেওয়া আছে । বোখারী নানান দেশে ঘুরে বেড়ানো মানুষ । তিনি সবাইকে বুঝিয়ে দিলেন, কেউ ইচ্ছে করলে এই লকার ভাড়া নিয়ে ব্যাগ রাখতে পারে । অনেকেই সারাদিনের জন্য ব্যাগটা লকারে রেখে শহরে বেড়াতে চলে যায় । সন্ধ্যায় এসে ট্রেন ধরে অন্য কোন গন্তব্যে চলে যায় । হোটেল ভাড়াটা বেঁচে যায় । এবার জামান ভাইয়ের কণ্ঠ বেশ নিচু, ‘জহির, আপনার বিখ্যাত মানুষ আইবো না । খামাখা সময় নষ্ট কৈরা লাভ নাই । বোখারীরে কন লকার ভাড়া লওনের ব্যবস্থা করতে । ব্যাগ রাইখা চলেন যাই । বার্লিন প্রাচীরের ভাঙা ইটগুলি দেইখা আসি । পারলে দুই একটা টুকরা পকেটে কৈরা নিয়া আসি । বাসায় নিয়া ড্রয়িংরুমে সাজাইয়া রাখুম । ফিরা আইসা রাতের ট্রেন ধৈরা চলেন প্যারিসে যাই গা ।’

গ্রীষ্মের সকাল । আঁড়মোড়া ভেঙে জেগে উঠছে বার্লিন শহর । আমরা আবার খোলা প্লাটফর্মেরে ফিরে আসি । সামনে বকবকে পরিষ্কার আকাশ । পলুশনমুক্ত বাতাস । আমরা ফুসফুস ভরে নিঃশ্বাস টানি । আর তখন টের পাই পেটের ভেতরে ইদুর দৌড়াচ্ছে । ইদুর মারার ব্যবস্থা কি ? এতো বড় স্টেশন, একটা রেস্টুরেন্ট থাকবে না ? বার্লিন শহরের এই শীতল অভ্যর্থনায় আমরা সত্যিই বিরক্ত । প্লাটফর্মের উল্টোদিকে তখন সূর্যোদয়ের মতো উদিত হলেন এক ছোটখাট গড়নের মানুষ । গায়ের রঙ আমাদের মতোই, সজারুর কাটার মতো পরিপাটি চুল কানের ওপরে নামানো, ঠোঁটের ওপর কালো গোঁফ । পরণে পেস্ট কালারের একটি সামার জ্যাকেট । জ্যাকেটের পকেট থেকে ডানহাত বের করে আমাদের দিকে বাড়িয়ে দিয়ে বলেন, ‘আমি দাউদ হায়দার । দুঃখিত দেরী হয়ে গেল ।’

লেখক: কবি, জাতিসংঘের আন্তর্জাতিক পেশাজীবী